

Кому Республикаса том войтырлөн газет



МОЛОДА

2014
ода-кора
30-өд
лун

21 №
(1146)



«Өта-мөддөс
быттьө рөмпөштанысь аддзам»

13 л.б.



**Тайо
НОМЕРЫН**

Гожся каникулъяс водзын бөръя звёнок дырйи ГИМС-ысь да «СПАС-Коми» котырьсь спасательяс аддзысьлісны велодчысьяскөд Сысола ю вылын. Найо петкөдлісны, кызди колана ногөн кутны асьтө ва вылын. Видзөдысьясон вөліны Сыктыварса 7 номера школа-ысь велодчысьяс.

4
л.б.

Таво Коми Республикаса гижысьяс Иван Куратовлөн чужомсянныс 175 во тыригкежлө кытшовтісны поэткөд йитчөм местаяс, ветлісны Архангельск областьса Яренск сиктө, Вөлөгда да Алматы каръясө. Зэв нимкодъ, мый öнiя кадөдз Иван Алексеевичөс пыдди пуктöны, казытылöны бур кывиöн и мукөд муын, видзöны сылысь паметъсö.

8-9
л.б.

Кызди бара-й олоны дзик öткөдъ йöз - близнечыяс? Найöс öд нинöмön он торйöд. Налөн оломыс быть торьялö мукöд йöзысь. Уси шуд төдмасьны кык чойкөд. Со мый öтарыс ас йывсыныс висьталö.

12
л.б.

Эгö и төдлöй, кызди гожöмыд воис. Ичöt классö ветлысьясöс каникул вылö нин лэдзисны. А гырысьджыкъяс медбөръяс вежон велөдчöны. Ывлаын шо-ныд, лöсьыд. Гортад оз и пукав-сы, пыр окота ёртъясыдкөд котральштны улич вылын. Талунъя номерын посниуловлы вöзъям ывлавыса некымын ворсöм, медем кадныд гажа-джыка да шудаджыка колис.

16
л.б.

Унанад öд гажаджык!

Син ланнитігкості бөрö колины майся празд-никъяс. Керка-карта гөгөр пелькөдчöма, кодкө пес на тэчö, мөд град дасытö. Тлом йöзыс бара-й отсасыöны оз бать-мамыслы-а? Чайта, сикт-са томуловыд уджтöгыд тайö «пöсь» пöранас оз жö весь пукавны.

А велөдчысьяслы майбырыд! Көнкө, чунь вы-лас нин лыддьöны кымын лун коли каникулөдз. Дерт, школа помалысьяслы та серти абу ёна гажа - ЕТЭ-ыд став вын-эбöстö да кадтö босытö. Чинöм, ставыс лоö бур! Юрыд кө пель-пом вылад эм - ставсö венан! А велөдчытöгыд некыдз.

Миян öд, газет дасытысьяслөн, тшöтти «пöсь» кад. Мыйла шуанныд? Бара на во джын помасыö, бара на газет гижөдчöм понда юр висьö, да сьöлөм майшасыö. Ок öд этшаöн öнi том йöз пöвстсыыд лыддьысьöны. А коли кывъя петасы-ястö торйöн нин этшаöн. Мензбыны оз вер-мы! Ставныс «ВКонтактеын» лун и вой пукалö-ны: ичöt и вертьö, карса и сиктса. А газеттö оз лыддьыны. Дзик нин кө школаса библиотека-ын листалыштасны да серпас-снимокъяссö видзөдласны. Со и тиражным кыз синваöн бөрдö.

А кодлы нö ми эськө гижам? 23-өд во нин тай томуловлы водзмöстчам-а. Гашкө, дзик нинöм лыддьынысö «Йөлөгасыд» да? А мый нö либö он висьталöй миянлы, мыйджык эськө нöшта көсийö төдны коли ныв-зонмыс? Кутшöм выль рубрикаяс колöны? А мый, тiян чайтöм серти, ньöти оз ков газет лист бокрын? Тижöй, звөнитöй, пыралöй редакцияö (тшайнад век нин юктöдам).

Вайö, збылысь, мөвныштöй та йылысь. А нöшта - медшöрыс - гижөдчöй! Майся празд-никъяс мозыд öдйö öд кадыд лэбас июнь по-мөдзыд. Удитөдчöй, 300 шайтыд öд, көнкө, сюрас жö локтан во джын кежлад? Сэсса öд быд вежон кутас гортөдзыд воны «Йөлөгаыд». А ми вочасөн кутам бурлань вежсыны, мөв-ныштлам да, гашкө, газетлысь чужöмбансö вежам, выль рубрикаяс содтам, а мыйта на конкурс лоö!

Сідзкө, сёрнитчим. Тижөдчы, лыддьысь мам кывиöн, пырөдчы конкурсыясö да вермы. Да, ёртъясыдлы эн вунөд та йылысь висьтавны! Унанад öд гажаджык пошта вылад ветлыны.

*Став бурсö сиöмön да ыджыд лача кутöмön,
Галина МАКАРОВА,*

«Йөлөга» газетлөн главнöй редактор.





СПОРТ

- Тайо партийной проект, сы кузя став уджсö бура нин мовпыштöма да вынсьодöма, - висьталö Госдумаса депутат, «Детский спорт» проектöн веськöдысь Ирина Роднина. Сийö шыöдчис «Единая Россия» партиялөн регионса юкөнъяс дорö кывкутöмөн босытчыны тайо уджö.

Регионъяс асьныс бөръясны, кутшöм школаясысь спортзал колö дзоньтавны. Эм некимын корöм: спортзаллөн ыдждыс мед вöли 9x18 метра, а школайн мед велöдчис 100 мортсысь эз этшаджык.

- *Проекты оз помась сöмын дзоньтасян удж выльн, миян мог сынн, медым спортзалыс прöс-*

2014 воын дзоньталасны республикаса 22 сиктса школаясь спортзал, нöшта 36 велöдчанін могмөдасны спорт эмбурөн, а нöшта 2 школайн вöчасны восьса энэж улын спортплощадка. Та могысь Коми Республикалы сетасны съёма отсөг федеральной бюджетысь «Детский спорт» уджтас серти.

Сиктса школаяслы - выль спортзал

та эз ов да мед вöдитчисны колана ногөн, - тöдчöдис фракцияөн веськöдысь Александр Макаренко.

Кык школаясь жыръяс лöсьодасны спортзал улö. Öнiя кад вылö эм 79 школаса спортивной клуб, на дорö содтасны нöшта кöкъямысöс.

Проектсö олöмö могмөдöм могысь лöө видзöма федеральной да регионса бюджетъясысь 20 миллион шайт.

Госсөветлөн юөр серти



КОЛАНА УДЖ

Кулөмдiнса школа помалысьяслы котыртлiсны аддзысьлөм водзö вылö велöдчанiн бөрйöм серти.

Мед республикалы да районлы вöли коланаөн

Комиын экономика сöвман министерствоысь Екатерина Фотиева пасйис, мый аддзысьлөмыслөн медшöр могөн лöө ышöдны школа помалысьясöс бөрйыны буретш Коми Республикаса велöдчанiнъяс. А сiдзжö тыр-бур велöдöм, уджөн могмөдöм, республикалы бур специальстьясöс бытöм.

Выпускникъяслы петкөдлiсны Коми Республикаса куйм вылыс тшупöда велöдчанiн: СГУ, УГТУ ДА СЛИ. Йöзöс уджөн могмөдан Кулөмдiн районса шöрин юөртiс, кутшöм удж сикас ёнджыка колö районлы да республикалы.

Ныв-зонлы лöсьöдiсны вылыс тшупöда велöдчанiн йылысь презентация, тöдмалiсны быд вузлысь аслыспөлöслун. Шуам, УГТУ-лөн эм бур спонсоръяс да нима стипендия. Мöд курсын студент босытö нима стипендиясö 6 сюрс шайт, а нельöд курсалөн и 30-40 сюрс шайтöдз кайö. Сiдзкö, эм помка бура велöдчыны. Вөр институтын эм и нима, и республикаса стипендия. Вөр институт помалысь студент босытö кык специальность, öтиыс - уджалан (рабочöй). Коми Республикаса образование министерствоысь Сергей Филиппов шыöдчис выпускникъяс дорö, медым найö сетасны юалöмъяс.

Вылыс тшупöда велöдчанiнъяс серти выпуск-

никъяслы разöдiсны буклетъяс, колана юөра кабала да газет. Аддзысьлөм вылö волiс 45 выпускник эз сöмын Кулөмдiн сиктысь, но и матысса сиктгрездысь. Коли сöмын бура мовпыштны да бөрйыны сьölöм серти специальность.

Йöзöс уджөн могмөдан Кулөмдiн районса шöринлөн юөр сети



21/05/2014 11:55



ТӨД ВҮЛӨ

Гожся каникул водзын бөръя звёнок дырйи ГИМС-ысь да «СПАС-Коми» котырысь спасательяс аддзысьлісны велөдчысьяскөд Сысола ю вылын. Найö петкөдлісны, кызди колана ногөн кутны асьтö ва вылын. Видзöдысьясөн вöліны Сыктывкарса 7 номера школаысь велөдчысьяс.

Куж отсавны вöйысьлы

Медводз ныв-зонлы юөртісны, мыйысь колö видзчысьны ва вылын, кызди колана ногөн кутны асьтö виччысьтöмтор дырйи. Нöшта висьталісны медшöр индöдъяс йылысь, кызди отсавны аслыд да неминуаö сюрöм мортлы. Велөдчысьяс сюся кывзісны. Индöдъяс пель саяныс сюркнялöм бöрын позис аддзывны ставсö ас синмөн. Спасательяс петкөдлісны, кызди отсавны ваö веськалöм мортлы, кызди вöдитчыны мездысьяслөн эмбурөн - пöльтöм пур, круг, линемётөн. Торйөн нин кажитчис челядлы линемёт, коді лыйлö гезйөн уна-уна метра ылаө.

Медбöрын челядь висьталісны, мый уна колана юөр тöдмалісны мездысьяскöд аддзысьлöм дырйи. Но, дерт, öтитор - тöдны, мöдтор - оз ков повзыны да виччысьтöм лöөмтор дырйи быть отсавны вöйысь мортлы. Но пыр жö спасательяс эскöны, мед эськö олöманыс став тайö колана тöдöмлуннас велөдчысьяслы оз ковмы вöдитчыны збыльвылö.

*Россияса МЧС-лөн
Коми Республикаын медшöр управлениелөн
юөр серти*



ВОДЗМӨСТЧӨМ

Неважён «Коми гор» телерадиокомпания да С.Я.Маршак нима челядьлы библиотека нуодисны «Челядь синъясён телевидение» республикаса викторина.

Кодён эськө ме көйи уджавны телевидениеын?

Буретш 50 во сайын, 1964-өд вося июль 2-өд лунö, Сыктывкарын да матігөгöрса посёлокъясын олысьяслөн медводдзаысь лои позянлун видзöдны телевизорысь передаяс - юркарын кутис уджавны телестудия. А 1970-өд воясö нин телевидение паськаліс республикаса сикт-грездясын.

А медым тшупöда паса телерадиокомпания йылысь унджыкөн тöдмалісны, «Коми горын» уджалысьяс мөвпыштöмаöсь нуöдны челядьлы викторина. Сьöкыдкодö юалöмъяс вылö воча-видзöм кындзи, челядьлы коліс нöшта на и гижны «Кодён эськө ме көйи уджавны телевидениеын?» сочинение-эссе да серпасавны «Аския телевидение».

Конкурс вылö воöма республикаса быд пельöсысь 135 удж. Нимöдісны вермысьясöс С.Я.Маршак нима челядьлы библиотекаын. Нуöдіс гажсö библиотекаын уджалысь Алёна Николаевна Несетерова. Конкурсö пырöдчысьяслы козинъяс да дипломъяс юклісны арлыд урчитöмөн да нимпасьяс вылö юклöмөн.

Уси шуд тöдмасыны конкурсын приза местаас босьтысьяскөд, Сосногорск карса 3 номера школаын 5-6 классъясын велöдчысьяс Анастасия Яблоковакөд, Александра Синюшкинакөд да Екатерина Поповакөд. Аслас уджысь Настя босьтіс 1 местаа диплом, а Саша да Катя - 2 местаа дипломъяс. А республикаса викторинаö ышöдöмаöсь нывъясöс пырöдчыны коми кыв велöдысьяс: Лариса Валерьевна Евсеева да Наталья Николаевна Артеева.

Нывъяс висьталісны, мый викторинаын сетöм юалöмъясыс вель сьöкыдöсь вөлöмаöсь, ковмöма уна лыддысьсны-юасыны да тшöтш и öтув-везійысь корсысьны. Нöшта сьöкыдджык вөлöма гижны сочинение-эссе, но отсöг вылö воöмаöсь велöдысьяс.

- Викторинаö пырöдчöм сы мында вьльтор мианлы восьтіс, - радпырысь висьталісны нывъяс.
- Вөлöмкө, коми телевидение йылысь ми зэв на этша и тöдам. Аттö сэтчöс уджалысьяслы татишöм конкурс нуöдöмысь. Нöшта ыджы аттö миан велöдысьяслы, мый ышöдісны мианöс босьтчыны тайö уджас да став сьёлöмсянныс отсалісны.

Медбöрын нывъяс öтув снимайтчисны «Ас му вылын» уджтас нуöдысь Марина Третьяковакөд да кыпыд сьёлöмкылöмъясөн мөдöдчисны бөр Сосногорскö. Чайтöм серти, водзö томуловлы нöшта на окота лоö пырöдчыны уна сикас конкурсö, öд республикаын медводдза да мөд меса-теастö оз на и быдöнлы мойви босьтны.

Миян корр.



Кöрткерöс районса Шойнаты шöр школаысь 5-öd класса велöдчысьяс гижöны «Ме ола сиктын» тема вылö серпасторъяс.



Трöшсиктын - медся гажа

Миян керка сулалö Нёбдін сиктлөн медмича местаын - Трöшсиктын. Бать висьталö, мый керка вылас вöрсö пöрöддöмаöсь 1987-öd воын. Сэкся кадö том йöз ёна стрöйтчылöмаöсь Трöшсиктас. Миян керка сулалö дзик сикт шöрас. Лэптöмаöсь сійöс 1988-öd воын. Вöчöмаöсь ыджыд öшиньяс, югыд жырьяс, мича веранда. Бать-мамлөн зиль киподтуйöн ставыс бура и артмöма. 1989-öd воын петöмаöсь нин овны выль да ыджыд, сöстөм да гажа керкаö. Со и ме чужи тайö керкаас. Мен зэв ёна кажитчö овны миян Трöшсиктын.

Снежана ТИМУШЕВА,
5 класса велöдчысь



Чимкодь, мый ола сиктын

Ме ола Шойнатын Совхоз улича вылын. Миян керка кык судтаа. Вöчöма керкасö пуысь. Улиас миян кухня да пöрччысянин. А мöд судтаас ыджыд да кык узьлан жырьяс. Öтиыс менам да воклөн, мöдыс мамлөн да батълөн. Керкаыслы öнi кызы во нин лои. Сійöс стрöйтöмаöсь пожöм пуысь. Миян керка дорын быдмö уна коз пу, эмöсь картофель градьяс. Меным зэв нимкодь, мый ме ола сиктын.

Тихон КРИВОШЕИН,
5 класса велöдчысь.



Тани и ме чужи

2008-öd воын ми заводитим кыпöдны выль керка. Керкасö батьöй лэптис керйысь, артмис кык судтаа. Улиас сöмын пусянин, а вылас пыранин, челядълөн, мам-батълөн да ыджыд шойччан жырьяс. Виль керка местасö бöрийим важ керка дорсянь неылын. Миян керка зэв югыд, кыпыд, мича, ыджыд. Öшинь видзöдö юбокса вöрö. Асывнас чеччан да видзöдлан öшиньсайса мича серпас вылö, да сідзи и окота нюмъявны лунтыр. Меным зэв ёна кажитчö миян выль керканым.

Карина КОЛОМЕЕЦ,
5 класса велöдчысь.



Окотапырысь йөзөдам Геннадий Иванович Поповлысь пудъясян кывъяс. Гожся каникул дырйиыд ыела вылад ворсигад, чайтам, унаысь на коемылас пудъясьнытö.

Ышка-пошка, вильски-вальс,
Гуля-голя...Пальс!

Өтчид öти, мөдысь кык
Шедис меным сьöма мык.
Коймөдысьсö шедис нель,
Юас сэсся эз и коль.
Кымын чери шедис мен,
Ковмас артавнысö тэн.



Ыджыд юын джуджыд йир,
Джуджыд юас ыджыд сир,
Паськыд вома, горш.
Коді полö - вош!

Коз пу дорын кисьмö оз,
Дозийö вота сьылігмоз.

Вуграси ме кузьлунтыр,
Вайи чери тус тыр:
Нель гурина, куим мык,
Ёсь емъяса йөршыс кык.
Тэн кө колö чери вый,
Вугыр босыт да ачыд кый.

Чангыль ныра öти,
Чукля бöжа кык,
Лайкъя коска куим
Кыйисны нель мык.
Öти, кык, куим, нель,
Ставсö сөйим,
Тэн эз коль.

Öти кык да öти кык
Лоö нель.
Тадз ме лыддя
Пожом коль.
Кольсö вöрысь вайис Коля,
Уна на пö сэтчö коли.
Тэн кө колö, ветлы тшöтш,
Чуман босыт да тырыс лöд.

Öтик алей, кык алей,
Куим алей, вит алей.
Кутшöм лыдпас
Абу тан?
Öни тэ мен
Висьгалан!
- Лыдпас нель.
- Öти, кык, куим, нель.
Молодеч!
Утка, дзодзöг, тури, юсь,
Сьöла, дозмөр, варыш, сюзь,
Ноко, висътав меным,
Коді колö тэныд?
- Дозмөр.
(Воззö лыддьöдлöны шуыс-
сянныс «дозмөр» кывйöдз.
Коді лö «дозмöрыс» - сийö
нүдö ворсöмсö).



КОМИ КЫВ МЕН ДОНА

Таво Коми Республикаса гижысьяс Иван Куратовлөн чужомсяньыс 175 во тыриг-

кежлө кытшовтисны поэткөд йитчөм местаяс, ветлісны Архангельск областса Яренск сиктө, Вөлөгда да Алматы карьясö. Зэв нимкодъ, мый öнiя кадöдз Иван Алексеевичöс пыдди пуктöны, казътылöны бур кывйөн и мукöд муын, видзöны сылысь паметсьö.

Яренскö да Алматыö ветлöм йылысь сьölöмкылöмъясөн юксьö Коми Республикаса гижысь котырөн веськöдлысь Елена Козлова.

Иван Куратовлөн чужомсяньыс - 175 во

Юасисны коми литература йылысь

Яренск карын (öни тайö Архангельск областса Ленск районлөн Яренск сикт) Иван Алексеевич Куратов велöдчис духовной училищеын. Сийöс казътылöм могысь вöвлöм училище керкаас öшалö Куратовлы сиöм мемориальной пöв. Ми, Сыктывкарысь воöм де-

легация да Яренскса чукöртчöм йöз, пуктiм дзоридзьяс казътылана пöв дорö да бур кывйөн казътылим Иван Алексеевичöс.

Сэсся аддзысьлим сэтчöс йöзкöд библиотекаын. Сэни миян локтигкежлö тшöтш дасътысьöмаöсь, лэдзöмаöсь миян медводдза коми поэтлы сиöм буклет.

Том йöз, школаын гырысь классын велöдчысьяс да сиктса верстьö йöз юасисны Коми Рес-

публика йылысь, öнiя коми литература йылысь. Миян делегацияын вöліны гижысьяс - Елена Габова, Александр Суворов, Татьяна Канева, карса литературной да Визинса краеведческой музейясын уджалысьяс, радиожурналист Галина Ведерникова.

Весиг Казахстанын тöдöны

Алматы карö (важөн шусылис Верный карөн), көни Иван Алексеевич Куратов оліс бөръя вояссö да сэни жö висьöмысь 36 арöсөн кувсис, ми мöдöдчим сизимöн: министр Галина Ивановна Габушева, Сыктывкараса администрацияын культура юкөнөн веськöдлысь Г.В.Стодольская да ми нель гижысь - поэт Андрей Попов (сийö ачыс Куратов рöдысь), «Арт» журналөн юрнуöдысь Галина Бутырева, поэт Надежда Мирошниченко да ме - Елена Козлова.

Лэбим самолётөн Москваöдз кык час, сэсся водзö 4 час. И со ми Казахстанынь. Миянöс вочаалис «Простор» журналөн веськöдлысь В.Ф.Михайлов, сэсся сийö и лои миян медся матысса ёртөн. Алматы карын ми вöлим кык лун. Воддза лунас ветлим гижысьяслөн котырö, аддзысьлим сэтчöс гижысьяскöд. Сэсся вöлі ыджыд литературной рыт сэтчöс библиотекаын, кытчö чукöртчылісны роч да казах гижысьяс, том



йоз да верстьо. Сэни, дерт, ми ёнджыкасё сёрнитім Иван Куратовлөн олём да творчество йылысь.

Миян локтігкежлө алматыса водзвыв дасьтысьмоаёсь, восьтомаёсь выставка. Коми небөггыс сэни абу этша, воддза вольт делегациясыс вайлөмаёсь. А бөрьяысьсё Казахстанё коми войтыр волёма 1989-өд воын, буретш Куратовлы чужомсяныс 150 во пасыйгөн. И со ми бара на воим кызь вит во мысти.

Мөд лунас ми ветлім А.С.Пушкин нима нельөд номера гимназияё, коді сулалө Иван Куратов нима улица вылын. Аддзысьлім сэтчөс велөдчысьяскөд да челядькөд. Найө зильоны унджык төдмавны медводдза коми поэт йылысь и сэк жө көсьоны төдмодны сылөн творчествоён унджык йөзөс. Найө зэв ёна көсьоны ёртасьны миян республикаса челядькөд. Гимназияын аддзысьлөм бөрын ми мунім Иван Куратов улица кузя. Воим сійө керка дорас, көні овлөма медводдза коми поэт. Ёні сійө керка местаас сулалө нин мөд стрөйба. Мемориальной пөвйыс абу, шуисны, мый важысла киссьома. Керка дорас, быдмысь виноградникө ми пуктім дзоридзьяс.

Миян водзө сувтис мог: лөсьөдны выль мемориальной пөв. Колө бура мөвпыштлыны, кызди тайөс вөчны. Бөрас ми снимайтчим пөрысь вяз пу дорын, сэни шуоны сійөс карагачён, гашкө, тайө пуыс помнитө на И.А.Куратовөс, а, гашкө, сійө ачыс на пуктыліс тайө пусө.

Сэсся миянөс нуөдлісны гөрасясө. Сэни Тянь-Шаньлөн отрог, Алатау гөра. Нуөдлісны «Медео» конькобежной каток вылө да «Чембулат» горнолыжной станцияё.

Кык лун ми вөлім Алматыын, а сы мыйта аддзылім да төдмалім.

«Простор» журналын йөзөдөмаёсь Павел Лимеровлысь Иван Алексеевич йылысь статья да роч кыв вылын Куратовлысь кывбурьяс, вуджөдысьыс Андрей Попов. Казах кыв вылын кывбурьяс йөзөдөма поэт Ибрагим Исаев. Мед эськө и водзө Казахстанын Иван Куратов йылысь унджыкөн төдасны.

Елена КОЗЛОВА



А Май 6-7 луньясө коми гижысь котырөн веськөдлысьсөс вежысь Андрей Попов, Валерий Выхин, Елена Афанасьева да ме - Любовь Ануфриева ветлім Вөлөгдаё.

Казьтылім и Вөлөгдаын

1854-1860 воясын Иван Куратов велөдчылөма Вөлөгдаса духовной семинарияын. Университетлөн керка стениын ошало поэтыс сійөс мемориальной пөв. Тайө пөв дорас нуөдім митинг, кытчө волісны гижысьяс, университетса велөдысьяс, Коми Республикаса «Северяне» землячествоо пырысьяс. Тані юргисны Иван Куратовлөн коми кывбурьяс, лои шуөма миян поэт йылысь уна шоньд кыв. Тайө аддзысьлөм бөрас паныдасьлім университетса студентьяскөд, найө радпырысь кывзисны Иван Куратов да өнія коми литература йылысь юөрьяс. Зэв кыпыда муніс ляддысьысьяскөд аддзысьлөмыс Вөлөгдаса областной библиотекаын. Йөзыс унатор юасисны Коми

муын олём да литература сөвмөм йылысь. Вөлөгда карён, важ памятникьясён, вичкоясён миянөс төдмөдіс Вөлөгдаса гижысь котырөн веськөддысь Михаил Иванович Карачёв. Сійө нуөдіс Сыктывкарысь воөм гөсьтыясөс гижысь Василий Белов патераө, төдмөдіс сылөн гөтыркөд. А сідзжө ветлім поэт Николай Рубцовлөн керка-музейо да гу вылас. Паныдасьлім и Вөлөгдаса гижысьяскөд: Р.Балакшинкөд, А.Ехаловкөд, О.Фокинакөд. Найө юөртисны, мый налөн сомын на заводитома петны «Вологодский литератор» литературной газет. Медбөрын гижысьяс козыналісны асьыныс небөггыс да корисны воыны Вөлөгдаё нөштаысь.

Любовь АНУФРИЕВА


Со кыдз сійӧс

Иван Алексеевич Куратов - медводдза коми поэт. Сійӧ чужліс 1839-öd вося сора 18-öd лунӧ Кебра сиктын (ӧні Куратово сикт).

Куратовъяслӧн вӧлі ыджыд котыр. Олісны кыдзи и мукӧд коми крестьяна: вӧдитісны видз-му овмӧс, видзисны гортса пемӧс, вотлісны вотӧс-тшак.

Воӧз муніс олӧмсьыс поэтлӧн батыс, Алексей Петрович, а мамыс, Екатерина Ивановна, став вын-эбӧссӧ сетіс пиянсӧ велӧдӧмлы. Зонъясыс ставныс босьтісны духовнӧй образование. Иван Куратов олӧмын медыджыд места босьтіс Василий вокыс. Сійӧ туйдіс Иванӧс радейтны литература да лоны бур мортӧн.

Коми му тӧдӧ Иван Куратовӧс кыдз поэтӧс, а ме тӧда сійӧс Э.Козловлӧн серпас-портретъяс серги. Со «Медбӧръя волӧм» серпас. Энгельс Козлов вӧлі Куратово сиктын. Сылы тӧдса и тайӧ радейтана ывлаыс. Ӧд тайӧ мичлунсӧ радейтіс да сьыліс коми поэт. Куратов аслас чужан сиктын, Кебраын. Поэт еджыд косо-воротка дӧрӧма, пукалӧ дзик прӧстӧй пу пызан сайын. Сы во-



дзын кабала да хрусталь черни-ла доз. Киас кутӧ перӧ. И видзӧ-дысьлы кажитчӧ, мый муза-лэбачыс шевкнитӧма бордсӧ поэт весьтӧ. Вот-вот бумага вылӧ пук-сясны кывбурлӧн сёрникузяяс. Ыргӧн югзьӧдантор сетӧ вӧсньы-дик сунис - бур вылӧ лача.

Поэт пукалӧ кык ӧшинь костын. А ывлаас гожся лун: ылын лӧзалысь вӧр, ю берег дорын гӧрӧм му, кытчӧкӧ нюжӧдчысь-котӧртгысь туй, латшвидзысь зорӧд, керкаяс да сы дорӧ ляс-нитчӧм пес чипас - ставыс тайӧ поэтлы сьӧлӧм пыдзыртана муса, дона, ас.

А ӧшинь вылӧ пунктӧма чӧд тыра доз. Мамыс вайӧма дона пыы-лы. Лабич вылын тотшвидзӧ туйс. Туйсыд - крестьяналӧн овмӧсад колантор, сылысь бурлунсӧ коми моргыд тӧдӧ. Ми кылам, мый Иван Куратов вир-яйнас йитчӧма Коми мукӧд, коми культуракӧд, и поэтлӧн творчествоыс дзулькӧн петӧ тайӧ олӧмсьыс.



төдә ме...

КОНКУРС

Поэт сьолөмнас кылө, мый ковмас кольны лөнь Сысола юсө, чужан керкасө, муса мамсө, шань чой-вокъяссө. И водзө Иван Куратовс виччысьö йөз му, но и сәні сійө вөлі чужан му радейтысь гражданинөн.

Куратовлы ковмис энөвтны чужан му. «Муса чужанінө» серпас вайөдіс мянөс Шөр Азияө. Сэтчө сійө локтіс 1867-өд воө. Служитіс поэт военно-судебной чиновникөн. Сылы удж кузьяс ковмыліс зэв уна ветлыны. Со и тайө серпасас Иван Куратов туйын. Сійө сувтөдөма ассьыс вөвсө, чеччөма телегаысь. Мый эськө мортөс сідз шызьөдіс? Да вот тай, еджыд юсьяс мөдөдчөмаось ылі войвылө. Иван Кура-

тов нюжөдө енэжлань кисө, бытгыө ачыс көсийө юсьяс моз жө лэбзыны. Но он тай кыпөдчы мусьыд!

Видзөдан коми поэт вылө и кылан: «Еджыд юсьясөй, нуой мясьянь муса войвылө, Кебра сиктө, менсьым лолөс. Висьталөй дона мамлы мясьянь пөсь чолөм»...

Куратов зэв гажтөмтчис чужанінсьыс, и кор сійө аддзө шлывгысь юсьясөс, казгыштө ставсө: и мамсө, и Кебра сиктсө, и вокъяссө, и Усть-Сысольскө кольөм мусасө, Александра Ивановна Поповаос. Но өні поэтлы колө прөщайтчыны юсьяскөд да водзө мунны служитны йөзлы.

Казахстанын гижөм кывбурьясын поэт норасис олөм вылө.

Радейтана уджлы, поэзиялы оз коль кад ни вын. Эз вөв и дзонь-видзалун. Поэт шогсис, мый уна көсийөм эз ло пөртөма олөмө:

*«Восьса өшинь дорын пукалі;
Тайө өшинь керыштли
Муса Комилань - и кылі:
Шог нюгыльтө сьылі...»*

Энгельс Козлов да Иван Куратов - кыкнанныс енбиа йөз. Серпасалысьлы мойвиис петкөдлыны поэтлысь сьолөмкылөмсө, сійө кужис нимөдны мича рөмгысөн медводдза коми поэтсө.

**Мария АБРАМОВСКАЯ,
Изьва районьыс**

**Изьвавомса школаын
8-өд класса велөдчысь.**

Велөдысь:

Зоя Александровна АРТЕЕВА



«Со кыз сійөс төдә ме...»

(Иван Куратовлы сиа тайө кывбурсө)

Кебра сиктысь Ивө-дивө
Вөлі збой да төлка зон.
Чой-вок костысь медся ичөт,
Мамлөн ыджыд лачатор.

Мамыс көсийс, медым Ваня
Мөдөдчас да велөдчас.
Лоас веськыд, төдысь мортөн.
Йөзлы буртор вөчалас.

Олөм мунис-шлывгис водзө,
Ваня быдмис, велөдчис,
Усть-Сысольскын православной
Училищеын уджавліс.

Лоис төлка, удал мортөн,
Рөдвуж ылөдз нимөдіс.
Поэмаяс и кывбурьяс
Коми кывйөн гижаліс.

Сылысь мича гижөдьяссө
Өні на ми кывлывлам.
Сьыланкывьяс мелі кывйөн
Куратовлысь сьывлывлам.

**Диана ФИЛИПОВА,
Изьва районьыс**

**Изьвавомса школаын
6-өд класса велөдчысь.**

Велөдысь:

Зоя Александровна АРТЕЕВА.

ЕНБИ Командировкаад ветлынытö ёна кажитчö: аддзысьлан да тöдмасын выль йöзкөд, унатор налөн олöмысь тöдмалан, а верман и другысь важ тöдсаястö аддзыны.

И сиктад гажжаа олöны

Та пöрйö веськавлi Сыктыв районса Межадор сиктö. И мый чайтанныд, важ тöдсатö öд аддзи. Аныс татчöс культура керкаын хормейстерөн уджалö. Сийö верöслөн öти сиктысь, а ме сылысь студенталигас на интервьютö босьтлi.



Тöдмасыöй, Ольга Егоровна Некрасова - том мам, быдтö кык челядьöс, а тшöтш и зев уна кад комялö культура керкаын. Сийö веськөдлö челядьлы «Колипкайяс» образцовöй фольклор ансамбльöн, ачыс на содтöд сылö «Сударушка» вокальнöй группасын. Сюсь, тölка да быдлаö сюртчысь аныс бура нин тöдöны районын. Аслас быдтасыськөд нырччö пырöдчыны быдсикас конкурсас и зильö шедöдны кутшöмкö да места. Пырджык челядькөд локтöны грамотаөн да аттьöалана кывъясьон.

А öд локтiс Межадорса культура керкаö неважөн на, куим во сайын. Сыöдз чужлис-быдмис Сыктыв районса Заречьеын, сэсь эштöдiс Сыктывкарса искусствояс колледж.

- Велöдчигад, дерт, эг чайт, мый локта уджавны сиктö, - висьталiс Ольга Некрасова. - А öнi нин татчö велалi га, мöглаö овны оз и кыскы. Велöдчöмöс помалi июнь тöлысьö, а августнас нин пыри уджавны. Дзик пыр се-

тiсны веськөдлыны челядь сылысь котырөн.

Ольга Егоровна став вынсö сетö сывны окитысь ныв-зонлы. Межадорса школаад велöдчысьыд абу уна. Та вöсна бура сылысь-ястö корсьны сьöкыдджык.

Уджсö заводитöны садикö ветлысьяскöд нин, на пöвстысь видлöны аддзыны енбия войтырöс. А сэсь быдтасысь гөлöс пуктöны. И со нин, неуна кад кольыштöм бöрын, нывка либö зонка вермö нин öт-нас сывны сцена высьянь.

Ансамбльöн аккомпониаторөн зильö Василий Меньшенин. Кыдз тай пасйисны - мый кылö, сийöс и ворсö. Со тадзи и уджалöны. Челядьлы

кажитчö, а налөн веськөдлысьлөн мог - аддзыны том-уловлы лöсялысь сылан-кывъяс да петкөдны найöс вöляникысь ыджыд сцена вылö. А та вылö медводз колö петкөдчыны быдсикас конкурс-смотрын да видлы-



ны шедöдны приза местаяс. Нöшта быд куим во колö дорйыны образцовöй ансамбльлысь ним.

А сиктаныс концерттö клубса-ыд быд гаж кежлö нуöдöны. Дастысьнытö томуров окотапырысь татчö котортöны. Найö шудаöсь, мый чужан сиктас ёна коланаöсь. Медым и водзö тадзи лоас.

Надежда ПУНЕГОВА.
Снимокъясыс Межадорса культура керкаысь.



Сё
ДИВӨ

Кызди барай олөны дзик өткодь йөз - близнечыяс? Найөс өд нинөмөн он торйөд. Налөн олөмыс быть торьялө мукөд йөзысь. Уси шуд төдмасьны кык чойкөд. Со мый өтарыс ас йывсьыныс висьталө.

Кодарным коді?

«Видзөд, видзөд, кык өткодьыс пө мунөны», - унаөн вөлі индалөны водзті дзолядырйи. Да и өні на паныдасьлөны сэтшөмьясыс. Мыйлакө звөнниясыс пыр йөзыслы кажитчө кутшөмкө вөвлытөм-торйөн. А ставыс зэв прөстө.

Чужим да быдмим Көрткерөс районса Ыджыдвидз сиктын. Пыр нимтісны Аня-Саняөн. Өні нимөдөны Анна да Александра Васильевнаысөн. Помалім Ыджыдвидзса шөр школа. Школа бөрын Аня велөдчис Сыктывкарса медицинскөй колледжын да лои фельдшерөн, а ме помалі Сыктывкарса канму университет да лои коми да роч кыв велөдысьөн. Көть и уджным торьялө, но кыкнанным уджалам йөзкөд: өтиным - челядьөс велөдө, мөдным - йөзөс бурдөдө.

Школаын весиг оценкаяс тэчлісны өтмоза (но эз сы вөсна, мый ми өткодьөсь). Олам ог өти инын - өтиным сиктын, мөдным - карбердса посёлокын. Но пыр өтамөд дорө кыскө. Артмылө весиг, мый өти и сійө кадө өта-мөдлы звөнитам.

Дзолясянь мам пыр зілис пасьтөдны миянөс өтмоза. Но унаысь тайө оз вөлі артмы: эм кө кык өткодь платьбөс лавкаын, то либө размерыс оз лөсяв, либө рөмыс мөд пөлөс. Но унджыкысьсө, мам шуө, паськөмным вөлі өткодь. Өні на со мам шуө, өткодья кө пө пасьтасянный либө паськөмнад вежсянныд, ачым на пө сорала (сералө) кодарный коді. А йөзыс өнөдз на оз торйөдны миянөс, а коді полө сорасьөмысь юалас медводз нимнымөс да водзө сөрнитас. Миянлы, дерт, тешкодь тайө...

Өтчыд, витөд классын велөдчигөн, роч кыв урок дырйи вежсим пукалан местаясөн. А миянөс өтлаөнсө некор эз пуксьөддыны. Урок джыныйс пөшти нин коли, да классысь детинкаяс кутісны вашкөдчыны пыр гораджык и гораджык. Сэсся кыз тай өти детинка чеччас (ог нин помнит



коді) да чуньнас индас миян вылө: «А найө местанас вежсьөмаөсь!» А велөдысьыд абу и казявлөма. Уна велөдысь оз вөлі торйөд миянөс, өтка-өткәлөн вөлі тайө артмө. Но асланым өткодьлунөн ми некор велөдчигад эг вөдитчылөй. Унаөн миянлы шуөны, позьө пө тиянлы өтиыдлы экзаментө ли кывбуртө велөдны да сдәйтны кыкнан пыддыд. Эз вөвлі татшөмыс, вывті честнойсь, буракө да.

Коркө мунім рынок вылө шапка ньөбны. Мерайтчим да корим рөмпөштан. Вузасьысьыд и шуө: «А мыйла пө тиянлы рөмпөштаныс, өта-мөдтө пө рөмпөштанын моз аддзанныд, өтиыд пасьталө, а мөдыд видзөдө». Анеқдот сямә артмылө.

Унаөн нөшта юасьөны, а верөсьясныд пө кызди тиянөс торйөдөны. Асьныс тай шуөны, медводдза кадсө пө быгтьө өткодьөсь

вөлім, а сэсся торьявны кутім, видзөдны пө колө сюсьдыка-а. А торйөдан гусяторьяссьө весиг и миянлы оз висьтавыны. А йөзыс тай, да и со мам шуө, өтарыслөн пө видзөдласыс чорыдджык, а мөдарыс пө нюмбанәджык. А нюмдам кө пө - дзик өткодьөсь. Вот и мөвпалөй сэсся - кодарным коді!

Мед көть и торйөн олам, пыр на соралөны. Шуам, паныдасяс карса улич вылын кодкө, чолөмәкө, соралөма миянөс. А сэсся и ми, велалөмаөсь да, юалам, кодсянь «приветсө» висьтавыны. А сиктын кө ме, и лекарствотө корөны, и уколасьнытө юасьөны (чойөй өд фельдшер). А мед оз өбөдитчы, вочавидза: «Вөлі бурдөдчәнінө, сөмын уджалан кадө, лекарствөыд эм...»

Александра ГАБОВА.
Снимокыс авторлөн.



ШӨПКӨДЧЫШТАМ

Быд нывлы колө кужны төдчөдны мичлунсө мича паськөмын, юрсиын, а нөшта мича маникюрын. Уналы оз судзсы кад да сьом ветлыны салонө, но позьё өд и гортад гыж бөрсяид дөзьөритны.

Мича сера гыж

& Медводз колө весавны гыжтө важ лакысь. Бурджык вөдитчыны турун подулын вөчөм средствоон, сийө ёнмөдас-бурдөдас гыжтө.

& Дорьяссө лөсьөдны пилочкаон, бурджык увсяныс. Вывсяныс кө мольөдны, верман тшыкөдны гыжтө: вөсьнөдан, чегласьны кутас.

& Водзө колө небзьөдны сідз шусяна кутикула. Та могысь содгыны ва пиө катшасин либө ма да тайө гудрасас видзны гыжтө. Позьё и майтөгөн небзьөдны.


& Кутикула мавтны вийөн, а сэсся нин позьё вундыны сийөс. Абу кө окота тайөс вөчны, позьё вештыны кучиксө дорланьө.

& Гыжйид дась и позьё нин мавтны сийөс. Медводз колө мавтны подув лакөн.

& Сэсся позьё босьтны выль сикас «Shellac», сийө дыр кутчысьө да и абу дука. Мича видзөдчас гыж вылад кутшөмкө сер, но кут төд вылын, мый ичөт чуньяс вылад гырысь серпасыд оз видзөдчы.

& Медбөрын мавтны сідз шусяна закрепитель. Сийө видзас маникюртө вушйөмысь.

Медым гыжйид пыр мичаон вөлі, колө ёна дөзьөритны сы бөрся. Быд куим лун кост мысти важ лаксө колө вуштыны, ёнмөдны витаминөн, вөдитчыны гыж ёнмөдан лакөн.



Мода йылысь

Гыж краситан мода пыр сөвмө. Лавкаысь позьё адзыны уна сикас лак, куж сөмын бөрйыны кажитчана рөм. Вузалоны и гыж серөдан-баситан-торьяс. Колө пасйыны, оз петны модаысь французской да өти рөма маникюрьяс.

Лоны мичаон абу сьөкыд, колө сөмын көсийөм. Кутшөм маникюр тавося модын, сьөкыд шуны, колө пыр төд вылад кутны нималана дизайнерьяслысь вөзийөгьяссө.



ТӨД ВЫЛӨ Гожомнас унджык том йөзгыс окоти-
тöны пырны уджавны - тыдалö,
гөгөрвооны нин сьöмлысь коланлунсö. А кодөн позьö
уджавны 14 арöса ныв-зонлы?

Кöнi позьö уджавны гожöмын?

Дерт, гожся каникулыд чйтсьö кузьöн - быдса куим тöлысь. Но öд пыран кö уджавны, кадтö он и кут тöдлыны. Ковмас велöдчыны юкны сийöс колана ногөн: торйöдны уджалан да шойччан кад вылö, а тайö нин томуловыдды зэв буртор.

★ И сiдз, гожомнас ныв-зонлы позяс уджавны промоутерөн. Кодi сийö? Тайö морт, кодi вöчö реклама кутшöмкö тöварлы либö прöдукциялы. Тайö уджыслөн эм весиг торъя ним - промоушенг.

Промоутерөн уджалысьлы ыджыдкодь фирма-компанияяс кутасны тшöкты-ны разöдны листовкаяс ывлатi мунысьяслы либö почта ящикъясö, нуöдны дегустацияс, тöдмöдны выль тöварөн, ветлыны викториналөн юалöмъясөн да уна мукöдтор. Уджонтö вермасны мынтыны быддунъя уджысь, а вермасны и артавны, мыйта тöлысьнас вöчин.

★ Эм нöшта öти вöзийöм - уджыштны курьерөн. Кодi сийö? Морт, коды колö ветлыны кар кузя да разöдны, шуам, колана корреспонденция.

Тайö уджыс воас сьölöм вылас налы, кодъяс оз радейтны пукавны öти местаын. Налы некор. Öти-кö, пыр колö тэрмасьны, меды ас кадö вайны ыстöмторсö, а мöд-кö, эм позянлун тöдмасьны колана йöзкöд, кодъяс казья-ласны тэнсьыд зильöмтö да вöзъясны донаджык удж.

★ Том мортлы позьö вöзийысьны уджавны гырысь вузасынiнъясö, ресторанъясö. Томуловлы танi окотапырысь вермасны вöзийыны пелькöдны-мич-мöдны йöр, мыськыны тасьтi-пань, джодж да уна мукöдтор.

Олöмыд тэнад, том морт. Ёна кö кöсьян нажöвитчыны, уджыд пыр сюрас - сиктсалы коть карсалы.



«Коми йөзöдчан керка»
Коми Республикаса агентство.
автономной учреждение.

Веськöдлысь
Н.Н.БЫКОВСКАЯ
Гл.редактор
Г.В.МАКАРОВА



Газет панысь:
Печать да юөр сетан Коми
Республикаса агентство.
Регистрируйтöма
2007 вося ноябрь 28 лунö
йöзлы юөр сетöм да
культураса озырлун видзöм
кузя оланпасьяс
збыльмöдöм бöрся
видзöдысь федеральной
службалөн Беломорской
управлениеын.
Регистрируйтан пас:
ПИ №ФС 3-0686.
Социальной тöдчанлуна
гижöдъясö йöзöдöма «Коми
йөзöдчан керка» автономной
учреждениеылы печать да юөр
сетан КР-са агентствöн
вичмöдöм сьöм вылö.



Редакциялөн адрес:

167982, Сыктывкар,
К.Маркс улица,
229-öд керка,
401-402 кабинетъяс.
Тел. 24-12-22, 24-36-49.
E-mail: Yologa@mail.ru



Редакцияын
уджалысьяс:
том йöзлөн мытшöдъяс
юкөнөн веськöдлысь –
Надежда Пунегова;

письмö юкөнөн
веськöдлысь –
Екатерина Микушева.



Медводдза лист бокас
снимокыс
Александра
Габовалөн.



Авторъяслөн мөвпяяс оз
пыр лöсявны редакциялөн
видзöдласкöд.



Тираж – 568.
Гижöдчан индекс – 52099.
«Йöлöга» газет петö
1991-öд восянь
вөжоннас öтчид, комиөн.



Печатьö кырымалан кад:
график серти – май
тöлысьлөн 28-öд лунö
16 часын; кырымалöма
печатьö 16 часын.
Газет печатайтöма
«Коми республиканской
типография» ООО-ын дась
оригинал-макетъясысь.
167610, Сыктывкар,
В.Савин улица, 81
Заказ №



ВОРСЫШТАМ

Эгö и төдлөй, кыдзи гожомыд воис. Ичöt классö ветлысьясöс каникул вылö нин лэдзисны. А гырысьджыкъяс медбөръя вежон велөдчöны. Ывлаын шоныд, лөсьыд. Гортад оз и пукавсьы, пыр окота ёртъясыдкөд котралыштны улич вылын. Талунъя номерын посниуловлы вöзъям ывлавыкса некымын ворсöм, медем кадныд гажаджыка да шудаджыка колис.

«Ошъяс да мазияс»

Челядь юксöны кык котыр вылö: öтиясыс - «ошъяс», мөдъясыс - «мазияс». Ворсан места юкöны кум пельö. Öтиас олöны «мазияс», мөдас - «ошъяс», а шöрас сулалö вөр.

«Мазияс» пукалöны вывтасинн. Нуöдыслөн тшöктöм серти найö лэбзöны мала да дзизгöны. Сэккості «ошъяс» пырöны гусявлыны ма. Нуöдысь бара горөдö: «Ошъяс!» Тайö кадö скöрмöм «мазияс» лэбöны «ошъясöс» кутны-вөтлыны. Кодöс кутасны - ворсöмсьыс петö. Сэсся челядь вежсьöны местаяснас. Ворсны позьö сэтчөдз, кытчөдз оз дышöд.

«Лун да вой»

Ворсöм вылö ковмас уна рöма мел. Ворсысьыслөн лыдыс абу урчитöма. Нуöдысь юкö челядьöс кык котыр вылö. Öтарыс - «лун», а мөдыс - «вой». Ворсан местасö колö юкны кум вылö. Öтиыс - «лунлөн» керка, а мөдыс - «войлөн», шöрсаыс лоö «рöмыдөн». Коймөдас позяс овны ставныслы.

Ворсны заводитігөн кыкнан чукöрыс сувтöны шöрас öта-мөдыслы мышнас. Кор нуöдысь горөдас «лун», «войсяс» котөртöны гортаныс, а мөдъясыс видлöны кыйны найöс. Но «рöмыдысь» петны «лунсялы» оз позь. Кодöс кыйисны, сійö вуджö мөд котырас. Сэсся тадзи жö кутасьöны «войсяс».

«Нидзув»

Ворсысьыс колö квайт да унджык морт, ме артмисны параяс. Челядь сувтöны öта-мөдныслы паныд да кутчысьöны кияснас. Тадзи артмö дзиръя (ворота).

Медбөръяясыс мунöны дзиръятö да сувтöны водзвылас, и тадзи водзö. Мунны колö сідзи, медем дзиръя дорас эн кутчысьлы. А сулалыс «дзиръяс» вермöны вежланыс судтасö. Таын ворсöмыслөн сьöкыдлуныс.

Чеччалöй, котралöй да ыгужыга быгмöй!

«Көвдум»

Пудъясян кыв отсөгөн бөрйöны «ньобасысьыс», «булочникöс» да «көвдумöс».

Челядь сувтöны öта-мөд бөрсяс, кутчысьöны ёртыслы коскас. «Булочник» сувтö водзвылас, а «көвдумсыс» - медбөрас.

«Булочник» дорö матыстчö «ньобасысьыс» да юалö: «Эм-ö тиян көвдум?» Мөдыд вочавидзö: «Эм, со джадж вылас куйлö». А «көвдумыд» сэккості горзö: «Ме пышъя, пышъя» да котөртö «булочник» дорö. Ньобасысьылы колö удитны кыйны сійöс.

«Көвдумыд» кө удитас сувтны «булочник» водзö, ачыс лоö сы местаын. А медбөрйын сулалысь нывка либö зонка - «көвдумөн». А удитас кө «ньобасысьыдыд» кыйны «пöжастö», лоас «булочникөн», а «көвдум» - «ньобасысьысөн».



«Кöчьяс вöрынöсь»

Ворсöм вылö колö 5-7 ворсысь да öти «руч». Мукöдыс лоасны «пуясөн». На вылö позьö и верстьö войтырöс корны. Ворсан местасö юкöны кум визьөн. Ылыссаыс - видзьяс, сэни олöны «кöчьяс». Шöрыс - пемыд сук вөр. А «ручлөн» позйыс - видз бокас.

«Пуяс» катласьöны кияснысö вылö лэптöмөн. «Кöчьяс» öти видз помсяныс вөр пыр көсйöны котөртны мөд видз помö. А «ручуд» кыйөдчö, көсйö кыйны найöс. Кодöс кыйис, сійöс аслас гортас нуö. Ворсöмыс эштö, кор став «кöчыс» котөртасны мөд видзöдзис.